

**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Taon XXXV1 Blg. 9  
Mayo 7, 2005  
[www.philippinerevolution.org](http://www.philippinerevolution.org)

*Editorial*

## Palawakin ang antipasistang pagkakaisa

**K**agyat ang pangangailangan para ibayong bigkisin ang hanay ng mamamayang Pilipino laban sa lumalalang pagyurak sa mga karapatang sibil at nagbabadyang lantarang pasistang paghahari.

Mula 2001, aabot na sa 51 lider at kasapi ng progresibong partidong Bayan Muna ang pinatay at 14 ang dinukot at hindi pa natatagpuan. Labingwalong pinuno at myembro ng Anakpawis na ang pinaslang. Kinitil ang buhay ng dalawang kasapi ng Gabriela Women's Party. Walang humpay ang pagpaslang sa mga sibilyan, laluna sa mga magsasakang nagsusulong ng tunay na reporma sa lupa subalit pinararangang may kaugnayan sa rebolusyonaryong armadong kilusan. Lalong lumalawak ang saklaw ng pasistang panunupil kung ibibilang din ang napakarami nang kaso ng mga bigong pagpatay, pagdukot, iligal na pang-aaresto at pagkulong at iba't ibang anyo ng pananakot.

Kaakibat ng serye ng pamamaslang sa mga demokratikong pwersa ang puspusang pagtutulak ng rehimeng US-Arroyo sa mga pasistang panukala tulad ng Anti-Terrorism Bill at ng National ID System. Ang lahat ng ito'y naghahawan ng daan para sa pagpapatay ng paghaharing militar sa buong bansa.

Ngayon pa lamang ay halos batas militar na ang umiiral sa maraming bahagi ng bansa. Sa Catbalogan, Samar, mula nang itilagang he-

pe ng 8th ID ang berdugong si Maj. Gen. Jovito Palparan, Jr. ay nagtayo na ng detatsment ang militar sa bawat barangay at tuwi-tuwina'y sinosona ang mga komunidad ng maralita. Apat na myembro ng Bayan Muna mula sa bayang ito ang dinukot nitong Abril. Isa sa kanila ay patay na samantalang ang tatlo ay hindi pa natatagpuan. Sa kanayunan ng Eastern Visayas, libu-libong mamamayan na ang namakwit sa kanilang mga baryo dahil sa mababangis na operasyong militar at walang awang pagpatay ng AFP sa



***Mga tampok sa isyung ito...***

**Ang brutal na gera ng rehimeng US-Arroyo**  
PAHINA 3

**Araw ng Paggawa**  
PAHINA 6

**Mga detalye ng korapsyon ng rehimen**  
PAHINA 8

mga sibilyan.

Sa Mindoro, ipinagpapatuloy ng mga humalili kay Palparan ang mga kahayupang pinalaganap niya sa isla nang siya pa ang namumuno sa 204th Bde. Isa sa pinakahuling biktima ang mag-asawang Mangyan sa Mamburao, Occidental Mindoro na pinatay, pinagtataga ang mga bangkay at sinunog ng mga militar.

Sa komunidad ng mga Moro sa iba't ibang dako ng kapuluhan, malao nang mistulang batas militar ang naghahari sa dalas ng mga pananalbeyds, pambobomba, sapilitang pagpapabakwit, pagsosona, iligal na pang-aaresto at walang taning na detensyon ng mga mamamayan dito.

Sa lalim na ng krisis na kinasasidlakan ng rehimeng Arroyo, at sa tindi na ng pagkakahiwalay nito, bangis ng pasismo ang ginagamit nitong sandata laban sa mamamayan.

Inaakala ni Arroyo na ito ang susi upang makapanatili siya sa poder at matamasa ang lahat ng kaakibat nitong kurakot, luho at pribilehiyo. Ito rin sa tingin niya ang mabisang paraan upang madurog ang anumang pagtutol sa malulupit na patakaran at hakbanging sa eko-

## National ID, Anti-terrorism Bill mga pakana ng US

Lantaran na ang panghihimasok ng US para sa kagyat na paglapruba at pagpapatupad sa mga panukala sa pagkakaroon ng National ID at batas "laban sa terorismo."

Nitong Mayo 4, mariing kinundena ni Liza Maza, kinatawan ng Gabriela Women's Party ang direktang panghihimasok ng US sa pagbubuo ng panukalang anti-terorismo na nakasampa ngayon sa kongreso. Napag-alamang direktang nagdagdag ng mga probisyon sa naturang panukala ang mga upisyal ng US sa pamamagitan ng isang myembro ng grupong nangangasiwa sa pagbubuo nito. Partikular sa isiningit ng US ang mga probisyon kaugnay ng pagtukoy at pagkundena sa mga tinataguriang "kaaway ng estado" at kaugnay ng pagsapi sa mga "grupong terorista."

Upang idiin ang presyur, sinabi ni US Deputy Secretary of State Robert B. Zoellick na kailangan munang ipatupad ang mga batas "laban sa terorismo" at karagdagang mga buwis bago mabigyang-pagkakataon ang Pilipinas na makakuha ng pondo mula sa Millennium Challenge Account ng US na para umano sa mga proyektong pangkaunlaran ng mga atrasadong bansa.

AB

nomya na puspusang itinutulak ng mga pandaigdigang institusyong kontrolado ng mga imperyalista tulad ng International Monetary Fund at World Bank. Ang mga patakaran at hakbanging ito, tulad ng mga dagdag na buwis, walang humpay na pagtataas sa presyo ng mga produktong petrolyo, pagpapako

ng sahod sa napakababang antas upang makaengganyo ng dayuhang pamumuhunan, pagbawas sa pondo para sa mga panlipunang serbisyo at paglalaan ng malaking tipak ng badyet ng gubyerno sa bayad-utang at pagpapaubaya ng pambansang patrimonya sa mga mandarambong na kumpanya sa pagmimina at pagtotroso ay mariing tinututulan ng mga pwersang binibiktima ngayon ng pasistang pandarahas. Sila ang mga pwersang masugid na naglalantad at tumututol sa pagwasak ng rehimen sa kabuhayan ng mamamayan at pagsusubasta sa pambansang patrimonya. Sila rin ang pumupukaw, nag-oorganisa at nagpapakilos sa mamamayan upang labanan ang mga patakaran at hakbanging nagpahirap sa kanila.

Buong akala ni Arroyo na habang panahon niyang masisindak at masusupil ang mamamayan at walang pakundangan niyang maiipatutupad ang anumang naisin ng kanyang mga imperyalistang amo. Para tiyak niyang masupil ang kan-



Taon XXXVI Blg. 9 Mayo 7, 2005

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

[www.philippinerevolution.org](http://www.philippinerevolution.org)

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan. Maaabot kami sa pamamagitan ng email sa: [angbayan@yahoo.com](mailto:angbayan@yahoo.com)

### Nilalaman


<b>Editoryal</b>	<b>1</b>
National ID, Anti-terrorism Bill	<b>2</b>
Ang brutal na gera ng rehimen	<b>3</b>
Mistulang batas militar sa Samar	<b>4</b>
Iligal na pagkulong	<b>5</b>
<b>Matatagumpay na TO</b>	
Bigwas sa Quezon	<b>5</b>
Araw ng Paggawa	<b>6</b>
Korapsyon ng rehimen	<b>8</b>
Arroyo-Cojuangco, patuloy ang sabwatan sa <i>coco levy</i>	<b>9</b>
Rebolusyonaryong pakikibaka sa Nepal	<b>10</b>
Makasaysayang kumperensya sa Bandung, ginunita	<b>11</b>
<b>Balita</b>	<b>12</b>

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

yang mga kalaban, sadya siyang nag-iimbiba ng papataas na antas ng interbensiyong militar ng US.

Subalit pilit binubura ni Arroyo sa kanyang isipan na sa kabila ng 14 na taong lagim ng pasistang rehimeng Marcos, at sa kabila ng masugid na suporta rito ng US, unti-unting nagbigkis at nag-ipon ng lakas ang mamamayan hanggang sa matagumpay nilang napatalsik ang kinamumuhang diktador noong 1986. At nito lamang 2001, aapat na taon pa lamang ang nakalilipas, tiyak na sariwa pa sa alaala ni Arroyo ang daluyong ng protestang tumapos sa katiwalian at pandarambong ng sinundan niyang presidenteng si Joseph Estrada.

Malinaw ang aral na nahalaw mula sa malagim na kabanata ng batas militar. Tanging ang mahigpit na pagkakaisa ng pinakamalawak na hanay ng mamamayan ang makakapagsansala kundi man makapipigil sa banta ng lantarang pasistang paghahari. Tanging ang lakas ng kanilang organisadong pagkilos ang makatitiyak sa tuluytuloy na pagsusulong ng kanilang mga kahilingang pangkabuhayan at pagpapatupad ng mga hakbangin para sa kagyat na kaluwagan laluna ng mga maralita.

Ang libu-libong pumirma sa pahayag nitong Abril 27 laban sa serye ng pamamaslang sa mga aktibistang tunay na nagtataguyod sa kagalingan ng mamamayan ay sumasalamin sa tindi na ng pagkakahiwalay ng rehimeng Arroyo at sa lawak na ng hanay ng mamamayang tumututol sa pasistang panunupil. Tungtungan ito sa pagbubuo ng malawak na nagkakaisang prente ng mamamayan laban sa walang humpay na paglapastangan sa mga karapatang sibil at nagbabadyang panganiib ng batas militar. Marapat na iugnay ang ganitong mga pagsisikap sa pakikibaka para tuluyan nang patalsikin si Arroyo sa poder. 

## Ang brutal na gera ng rehimeng US-Arroyo

**W**alang awat ang pananalasa ng brutal na gerang inilulunsad ng Armed Forces of the Philippines laban sa mga sibilyan, ligal na demokratikong grupo at institusyong binabansagan nitong tagasuporta ng Bagong Hukbong Bayan (BHB) at mga prente ng kilusang komunista.

Ang sumusunod ang pinakahuling mga paglabag sa karapatang-tao:

**Walong aktibista dinukot sa Quezon.** Dinukot ng militar nitong Mayo 3 ang walong kasapi ng Kadamay-Southern Tagalog sa bayan ng Calauag. Kinilala ang mga dinukot na sina Leng Jucutan, pangkalahatang kalihim ng Kadamay-ST; Wilbert Capistrano; Pulo Capistrano; Virgilio Noel, konsehal ng barangay; Elmer Ongaria, tserman ng Sangguniang Kabataan; Tess Esguerra; at Sherlita Locario.

Ayon sa Karapatan-Quezon, naghahanda nang matulog ang mga biktima nang pasukin ng mga militar sa ilalim ng Southern Luzon Command (Solcom) ang kanilang tinutuluyang bahay sa Barangay Quinalin Ilaya. Hinlalughog ang buong bahay at ninakawan ito ng pera.


Nasa naturang komunidad si Jucutan, kasama ang mga kasapi ng Kadamay-ST, upang isadokumento ang pinakahuling insidente ng iligal na demolisyon ng mga komunidad sa kahabaan ng riles.

Tulad ng inaasahan, agad na itinanggi ng Solcom ang pagdukot sa walong aktibista. Kinabukasan, pinalabas pa nitong mga kasapi umano ng BHB ang apat sa hinuli.

Napag-alaman na lamang ng mga organisasyon para sa pagtatanggol ng karapatang-tao na iligal na ikinulong sa isang kampo militar sa Gumaca ang mga nawawalang aktibista. Sinampahan ng gawa-gawang kasong rebelyon sina Jucutan, Esguerra at Locario.

**44 na magsasaka hinuli sa Bulacan.** Dinampot at iligal na ikinulong ng militar nitong Mayo 5 ang 44 na residente ng San Miguel, Bulacan. Dinala sila sa kampo ng 702nd Brigade Command sa Bongabon, Nueva Ecija.

Pangalawa ito sa serye ng iligal na pang-aaresto ng First Scout



Ranger Regiment (FSRR) makaraang maganap ang mga sagupaan sa pagitan ng kanilang mga pwersa at isang platun ng Pulang mandirigma ng BHB sa magkakaibang baryo ng San Miguel. Bigo ang militar na lipulin ang mga Pulang mandirigma kaya ibinaling nito ang pasistang pananalakay sa walang kalabanlabang mga sibilyan.

Noong Abril 24, 12 magsasaka ang iligal na inaresto ng mga Scout Rangers. Dalawang araw na ikinulong ang mga magsasaka sa Camp Tecson sa San Miguel.

Kabilang sa mga dinampot si Ernie Santos, isang 32 taong gu-

lang na magsasaka. Magpahanggang ngayon, tumatanggi ang militar na ilabas si Santos. Natatakot namang magsalita si Florante Santiago na kasabay na dinampot ng militar. Iginapos at pinirangan ang mga mata ni Santiago bago kinaladkad sa kanilang sasakyan. Kintang-kita ang mga marka ng tortur na dinanas ni Santiago sa kamay ng militar.

Mariing kinundena ng mga residente ng San Miguel, kasama ng kanilang meyor at iba pang lokal na upisyal, lokal na pamunuan ng simbahan at iba pang demokrati-kong sektor ang walang pakunda-

ngang paglabag ng FSRR sa karapa-tang-tao ng mga biktima. Kinundena rin nila ang tumitinding militarisasyon sa kanilang lugar.

**Lider ng Anakpawis, pinaslang sa Bicol.** Binaril at napatay noong gabi ng Abril 25 sa Pamplona, Camarines Sur si Delio "Ka Yoyoy" Apolinar, *municipal coordinator* ng Anakpawis sa naturang bayan at dating tagapangulo ng Bicol Coconut Planters Association, Inc. (BCPAI), kaanib ng Kilusang Magbubukid ng Pilipinas (KMP). Itinuturong salarin ang mga ahente ng militar na ilang araw na nagmanman sa bahay ng biktima. **AB**

## Mistulang batas militar sa Samar

Mula nang maitalaga si Maj. Gen. Jovito Palparan Jr. sa Eastern Visayas, mistulan nang nakapailalim sa batas militar ang buong rehiyon, laluna ang Samar. Mula Enero hanggang Abril, naisadokumento ng Katungod-Sinirangang Bisayas (Katungod-SB) ang sampung kaso ng pananalbeyds, anim na kaso ng pagkamising (*desaperacidos*) at tatlong kaso ng bigong pamamaslang. Bunsod nito, marami nang mga Samareño ang lumilikas patungong Maynila at ibang lugar upang makaiwas sa tumitinding militarisasyon sa isla.

Kabilang sa pinakahuling kaso ng panghaharas ng mga tropa ni Palparan ang naiulat na panununog sa mga sasakyan ni Pergentino Deri-on Jr, isang abugado ng karapatang-tao. Dating pangalawang pangulo ng Katungod-SB ng Eastern Visayas si Deri-on. Bago ito, ibinunyag ng Katungod-SB ang nakuha nitong "order of battle" ng militar kung saan nakalista ang 36 na aktibista. Kabilang sa listahan ang mga tagapagtanggol ng karapatang-tao, katulad ni Alex Lagunzad, pangkalahatang kalihim ng Katungod-SB at Atty. Fedelito Dacut na pinaslang noong Marso 14.

Noong Mayo 3, binaril at iniwang sugatan si


Diosdado L. Abunda, kasapi ng Bayan Muna, sa Barangay Sto. Niño, Sulat, Eastern Samar. Si Abunda ay isang *technologist* sa Department of Agriculture. Pang-apat na siyang kasapi ng Bayan Muna sa Eastern Visayas na inatake sa loob ng dalawang buwan. Karugtong ang dalawang kasong ito ng hu-

mahabang listahan ng mga pagpatay sa mga progresibong lider at elemento sa rehiyon at sa buong bansa.

Gayundin, walang pakundangan si Palparan sa pagsalakay sa ordinaryong mamamayan. Karugtong ng serye ng pananalakay at panununog sa mga komunidad sa gitnang Samar noong Marso, binomba ng mga helikopter ng Philippine Air Force ang Barangay Catarman, Calbayog City at Pambujan sa Northern Samar nitong Abril 16, 19 at 20.

Nitong Mayo 2, may gana pang humingi ang berdugong si Palparan, Jr. ng karagda-

gang 300 sundalo para sa kanyang pasistang paghahari. Sa ngayon, ang 8th ID, na nakabase sa Catbalogan, ay may mahigit 6,000 sundalo at elemento ng CAFGU na nakapaloob sa tatlong brigada o siyam na batalyon, at nakapakat sa Samar, Leyte, Masbate at ilang bahagi ng Bohol. **AB**





## Aktibistang pangkapayapaan, iligal na ikinulong

**M**ariing kinundena ng GABRIELA ang pagdukot at iligal na pagkulong kay Angelina Bisuña-Ipong, isang aktibistang pangkapayapaan mula sa Western Mindanao. Nasa pulong-konsultasyon si Bisuña sa Anastacia Mission Village sa Lumbayao, Aloran, Misamis Occidental nang dukutin siya ng mga elemento ng 1st "Tabak" ID-Philippine Army noong Marso 8.

Tahasang paglapastangan sa usapang pangkapayapaan sa pagitan ng National Democratic Front of the Philippines (NDFP) at ng Government of the Republic of the Philippines (GRP) ang pagkabinbin kay Bisuña. Kasalukuyan siyang nakabimbin sa Pagadian City Jail sa Zamboanga del Norte at sinampahan ng kasong rebelyon. Hindi siya pinayagang magpyansa.

Sa unang 12 araw ng kanyang pagkakakulong, ipinagkait kay Bisuña ang kanyang karapatang makipag-ugnayan sa kanyang mga kamag-anak at abugado. Ilang beses siyang tinortyur. Noong Marso 12, siya ay piniringan, igina-pos at sekswal na inabuso habang pumapailalim sa interogasyon. Makailang beses siyang inilipat-lipat upang hindi agad matagpuan ng mga naghahanap na kamag-anak at mga organisasyong nagtataguyod ng karapatang-tao. AB

## Philippine Army, binigwasan ng BHB sa Quezon


**I**sang matinding bigwas sa kaaway ang tagumpay ng isang yunit ng Apolonio Mendoza Command (AMC) ng Bagong Hukbong Bayan (BHB) sa South Quezon na biguin ang papatinding operasyong militar sa prubinsya. Nanaig ang mga Pulang mandirigma sa dalawang magkasunod na sagupaan noong Abril 24 laban sa 201st Bde dahil sa maayos na pagbasa sa sitwasyon at mataas na mapanlabang diwa sa gitna ng ilang araw nang operasyong militar.

Naganap ang nasabing mga labanan sa Sityo Villaminda, Barangay Sto. Niño-Ilaya, Lopez, Quezon na nagresulta sa

pagkamatay ng di kukulangin sa 11 sundalo. Malaon nang naglulunsad ang mga yunit ng 201st Bde ng Civil Military Operations-Re-engineered Special Operations Team (CMO-RSOT) sa anim na barangay ng Lopez kabilang ang Sto. Niño-Ilaya.

Naganap ang unang labanan bandang alas-12:20 ng tanghali. Ginagalugad noon ng mahigit 100 tropa ng militar ang paligid ng lugar na hinihimpilan ng isang yunit ng BHB. Palibhasa'y nakahanda ang mga gerilya, naunahan nila ng putok ang umaabanteng siyam-kataong tim ng kaaway. Sa unang bugso pa lamang ng putukan, walo agad ang tumimbuwang sa militar. Tumagal pa ang putukan nang 30 minuto. Napasabog din ng mga gerilya ang inihanda nilang bomba sa bukana ng kinalalagyan ng himpilan kaya lalo pang lumaki ang pinsala sa kaaway. Maayos na nakaa-tras ang mga kasama nang walang anumang natamong kaswalti.

Noong bandang alas-5 naman ng hapon, binalikan ng 10-kataong iskwad ng BHB ang lugar na pinaglabanan. Mula sa mataas at paborableng posisyon, mu-



ling pinaputukan ng mga Pulang mandirigma ang mga sundalo sa loob ng 15 minuto. Walang nagawa ang militar kahit higit silang nakararami. Tila mga asong bahag ang buntot silang nagtakbuhan habang pinapuputukan ng mga gerilya.

Tulad ng dati na nilang nakagawian, mga sibilyan ang pinagbalingan ng karahasan ng mga duwag na militar. Inaresto ng AFP si Ben Sarmiento ng Sityo Villaminda noong Abril 25. Hinaras din nila maging ang mga residente ng mga karatig-barangay. Sa katunayan, iligal ding inaresto sina Poling Evangelista at Ruel de San Luis na naninirahan sa Sityo Baliswang, San Francisco B, Lopez, Quezon.

**Sa Bulacan.** Tinangkang durugin noong Abril 24 ng pinagsanib na pwersa ng First Scout Ranger Regiment (FSRR) at 56th IB ang isang nakahimpil na platun ng BHB sa Sityo Sulucan, Barangay Balaong, San Miguel. Bagamat ang kawayang ang siyang nakauna, naagaw ng BHB ang inisyatiba sa labanan. Ayon sa pahayag ng Eastern Bulacan Command noong Abril 26, aabot sa 10 sundalo ang napatay sa sagupaan habang anim ang sugatan sa panig ng BHB. Dahil sa mga kaswalting ito, dinampot at pinahirapan ng militar ang 12 residente ng Barangay Balaong.

**Sa Negros.** Tinambangan at pinarusahan ng isang pangkat ng BHB noong Abril 29 sa Barangay San Pablo, Manapla, Negros Occidental si Sgt. Tranquilino Malcredo, isang operatibong paniktik ng 11th IB. Duguan ang mahabang rekord ng 11th IB sa paglabag sa karapatang-tao saan man ito maipakat, maging sa Panay, Mindanao o Bohol. **AB**

## Araw ng Paggawa

# Pagdiriwang, masigla't matagumpay; mensahe ni Arroyo, binatikos



**M**ariing binatikos ng mga manggagawa nitong Mayo 1 ang patuloy na pagtanggig ni Gloria Arroyo na tugunan ang malakon na nilang iginigiit na umento sa kanilang sahod.

Sa desperadong tangkang ipakitang kinakalinga ng kanyang rehimen ang mga manggagawa, nagpahiwatig si Arroyo na iuutos niya sa Araw ng Paggawa ang pagtataas sa sahod. Sa halip, pagdating ng takdang araw ay hiniling lamang niya sa mga *regional wage board* na maglabas ng rekomendasyon sa loob ng 30 araw hinggil sa petisyon ng mga manggagawa para sa dagdag na sahod.

Taliwas ito sa kahilingan ng mga manggagawa na isabatas ang pagtataas ng sahod. Sa halip, idadaan pa rin ito sa mga *wage board*,

na dominado ng reaksyunaryong Department of Labor and Employment at ng mga kinatawan ng mga kapitalista at dilawang lider-union. Tahasan itong instrumento ng estado para ipako ang sahod ng mga manggagawa.

## Masiglang pagdiriwang, matatag na paglaban

Sa kabila ng pagwawalambahala ni Arroyo sa kanilang kagalingan, pursigido ang mga manggagawa na ipaglaban ang makatarungang sahod at iba pang nararapat na benepisyo at karapatan sa paggawa. Noong Mayo 1, aabot sa ilampung libong manggagawa at iba pang sektor ang humugos sa lansangan sa iba't ibang lugar sa bansa. Muling isinigaw sa araw na ito ang ilang taon nang iginigiit na

P125 umento sa minimum na arawang sahod ng mga manggagawa at P3,000 pagtaas sa sweldo ng mga kawani ng guberno. Kinundena rin nila ang pagpaslang sa mga lider at kasapi ng iba't ibang organisasyon at iginiit ang katarungan para rito Tampok ding isyu para sa araw na ito ang lalong pagbulusok ng kabuhayan ng mamamayan dulot ng sunud-sunod na pagtaas ng presyo ng mga produktong petrolyo at ng dagdag na VAT. Iginiit nila ang pagpapataksik sa rehimeng US-Arroyo.

Pinangunahan ang pagdiriwang sa buong bansa ng Kilusang Mayo Uno (KMU) na nilahukan din ng Bagong Alyansang Makabayan (BAYAN), Bayan Muna, Kilusang Magbubukid ng Pilipinas, Anakpawis, Kadamay, GABRIELA, Anakbayan, League of Filipino Students, Alliance of Concerned Teachers, COURAGE at marami pang iba.

Sa Kamaynilaan, nagtipon ang mga manggagawa sa magkakaibang lugar—sa tapat ng Philippine General Hospital sa Taft; Moriones, Tondo; Carriedo; Plaza Miranda sa Quiapo, TM Kalaw at iba pa—at pagkatapos ay nagmartsa patungong Liwasang Bonifacio kung saan isinagawa ang isang programa.

Nilahukan ang programa sa Liwasang Bonifacio sa Maynila ng



**Sa kabila ng pagwawalambahala ni Arroyo sa kanilang kagalingan, pursigido ang mga manggagawa na ipaglaban ang makatarungang sahod at iba pang nararapat na benepisyo at karapatan sa paggawa.**

humigit-kumulang 20,000 katao. Kinatampukan ito ng pagbubukas sa isang mural para sa ika-25 anibersaryo ng Kilusang Mayo Uno, mga mensahe ng mga lider ng iba't ibang organisasyon at mga personalidad, mga pangkulturang pagtatanghal, pagsunog sa *effigy* (imahen) ni Gloria Arroyo at pagpapalipad ng mga kwitis sa pagtatapos ng programa.

Sa Central Luzon, dumagundong sa pagdiriwang hindi lamang ang kahilingan para sa dagdag na sahod kundi pati na rin ang paggigiit ng katarungan para sa mga biktima ng masaker sa Hacienda Luisita. Bagamat hinarang ng mga pulis, mahigit 5,000 manggagawang kasapi ng Workers Alliance in Region III at BAYAN ang nagtipun-tipon sa tapat ng kampo ng Northern Luzon Command sa Tarlac City. Galing sila sa mga prubinsya ng Bulacan, Nueva Ecija, Aurora, Pampanga, Tarlac, Bataan at Zambales.

Sa Southern Tagalog, idinaos

naman ang multisektoral na mga pagtitipon sa Lipa, Batangas; Imus, Cavite; Antipolo, Rizal; Lucena City sa Quezon at sa Laguna. Ilandaang manggagawa at tagasuporta nila ang nagtipon sa Baguio City at Bicol.

Samantala, umabot sa 10,000 ang kumilos sa mga syudad ng Bacolod, Iloilo, Tacloban at Cebu at sa bayan ng Kalibo sa Aklan. May mga pagkilos din sa Mindanao—sa mga lunsod ng Davao, Gen. Santos, Cotabato at iba pa.

### **Bahag ang buntot ni Arroyo**

Sa matinding takot ni Arroyo sa poot ng mga manggagawa, umabot sa 16,000 kapulisan ang idineploy ng PNP sa Metro Manila nitong Mayo 1, kabilang ang ilang nagmula pa sa ibang rehiyon.

Pinabantayan nito maging ang Plaza Miranda (kahit may kalayuan pa ito sa Malakanyang). Binakuran ng mga *container van* at alambreng tinik ang lugar.

Samantala, isang lalaking naki-halo sa hanay ng mga raliyista sa Liwasang Bonifacio at nangunguha ng kanilang litrato ang hinuli ng mga manggagawa. Kinumpiska nila ang kamerang ginamit ng lalaki at ang kanyang ID. Nang ipagbigay-alam ito sa pulisya, dali-daling itinakwil ni NCRPO Chief Avelino Razon ang nahuling lalaki at sinabing hindi ito pulis kundi ahente ng Intelligence Service of the AFP (ISAFP).

Isa ring ahente ang nahuli ng mga manggagawa sa rali sa Laguna at nakumpiskahan ng kal .45 baril. **AB**

### **Mga Pinay, naglunsad ng martsa-rali sa New York**

NAGLUNSAD ng isang martsa-rali New York City, USA noong Mayo 1 ang mahigit 100 kababaihang Pilipino na kasapi ng Working Women's Contingent. Nagtipun-tipon sila bandang tanghali sa mataong Washington Square sa Manhattan para magtanghal ng programa laban sa imperyalistang globalisasyon, at pagkatapos ay nagmartsa patungo sa Broadway at Union Square, na dinadayo rin ng malaking bilang ng publiko.

Ilan sa mga nagsalita hinggil sa pangangailangan ng pagkakaisa laban sa imperyalistang globalisasyon ang mga lider ng DAMAYAN Migrant Workers Association, GABRIELA Network, Women's Anti-Imperialist League (WAIL) at iba pang aktibista mula sa mga organisasyon ng Southeast Asia at Latin America. **AB**

# Mga detalye ng korapsyon ng rehimen

Ibinunyag ng isang retiradong pulis-heneral na tumatabo ng limpak-limpak na salapi sina Mike Arroyo na itinago sa kodang M1, ang anak nitong si Mikey Arroyo (M2) at kapatid na si Ignacio "Iggy" Arroyo (JS7) bilang mga pangunahing padrino ng hweteng ngayon. Ayon pa sa heneral, inangkin ng tatlong ito ang kuleksyon ng lagay mula sa hweteng matapos mahalal si Gloria Arroyo noong nakaraang taon. Tinatayang aabot sa ₱7 milyon kada buwan bawat prubinsya ang nakukulekta ng nakatatandang Arroyo habang tumatanggap naman ng ₱3 milyon bawat buwan kada prubinsya si Mikey. Kahit nakabase sa Visayas, nakakukuha ng ₱3 milyon hanggang ₱5 milyon si Iggy Arroyo mula sa mga panginoon ng hweteng sa Luzon.

Ang iskandalong ito ang pinakahuli lamang sa mahabang listahan ng nabubunyag na mga detalye kaugnay ng malawakang korapsyon at anomalya ng pamilyang Arroyo at mga kroni nito. Kasunod ito ng iskandalo hinggil sa magarbong pamumuhay ni Mike Arroyo nang tumira siya sa loob ng tatlong araw noong Marso sa pinakamahal na pahingahan sa isang hotel sa Las Vegas, Nevada, USA (na nagkakahalaga ng \$20,000 o katumbas ng mahigit ₱1 milyon isang gabi).

Halos kasabay nito, ibinunyag ni Sen. Jinggoy Estrada ang sarisaring anomalya sa PAGCOR, ang tradisyunal na palabigasan ng sinumang pangkating nasa poder. Pina-ngangasiwaan ang PAGCOR ngayon ni Ephraim Eugenio, matalik na kaibigan ni Mike Arroyo at kilalang galamay ng mag-asawang Arroyo. Bukod sa kinukurakot ni Eugenio at mga alipures nito, hinuhuthutan din ni Eugenio ang PAGCOR, sa


ngalan ng kanyang mga padrino. Nitong taon, aabot sa ₱489 milyon ang nawawala sa pondo ng PAGCOR dahil ipinambayad diumano ito ng upa ng isang *casino* (pasugalan) ng PAGCOR sa isang hotel. Ngunit nang siyasin ito, hindi ito kabilang sa listahan ng mga gastos ng *casino* at lampas doble ito sa karaniwang halagang ibinabayad ng 13 ibang *casino* ng PAGCOR sa kani-kaniang mga inuupahang espasyo. Gayundin, milyun-milyon ang naglalaho na lamang sa PAGCOR dahil ginagamit itong pambayad sa 219 na konsultant at iba pang empleyado at alipures na ipinasok dito ng rehimen.

Malalaki man o maliliit, walang sinasanto ang mag-asawang Arroyo. Ultimong pagpapagawa ng mga uniporme ng mga empleyado sa Malakanyang ay pinakialaman na rin nila. Aabot sa ₱8 milyon ang halaga ng iginawad na kontrata sa isang suplayer para diumano sa bagong uniporme. Napakalaki ng halaga, ayon sa suplayer, dahil kalahati nito ay napunta sa isang malapit na kaibigan ni Mike Arroyo.

Kasabay ng lantarang pangungulimbat ng mga nasa Malakanyang, nag-uunahan naman ang iba pang mga upisyal ng guberno, militar at pulis sa paglimas sa natitirang rekurso ng bayan.

Pinakalitaw na rito ang pandarabong ni Maj. Gen. Carlos Garcia, dating *comptroller* o ingat-yaman ng AFP. Aabot na sa ₱303 milyon ang napapatunayang kinulimbat ni Garcia, kanyang asawa at mga anak mula sa pondo ng AFP.

Sa likod ng kaso ni Garcia ang mas malaki pang kaso ng pangungulimbat kung saan sangkot ang lihim na grupo ng mga nakatataas na upisyal-militar, ang dating kalihim ng depensa at kasalukuyang



kalihim ng Department of the Interior and Local Government na si Angelo Reyes at mismong si Gloria Arroyo. Pinaghahati-hatian ng maraming upisyal-militar ang kikkak mula sa mga kontrata at biniling suplay at kagamitan ng AFP.

Ngunit mas malaki ang nakokopo ng isang mas maliit na grupo mula sa napakalaking pondong ibinibigay ng US bilang pamalit sa mga gastos ng AFP tuwing mayrong Balikatan. Tatlong matataas na upisyal, bukod kay Garcia, ang bumubuo sa maliit na grupong ito. Dagdag sa pondo ng Balikatan, pinagpipistahan din ng grupo ang pondong ibinibigay ng United Nations (UN) bilang pamalit sa nagagastos ng AFP tuwing may lumalahok na mga sundalong Pilipino sa mga operasyon ng UN sa ibayong dagat.

Bago si Garcia, nariyan ang panghuhuthot ni Gen. Jacinto Ligot, *comptroller* ng AFP sa ilalim ng panunungkulan ni Reyes bilang kalihim ng depensa. Dalawang mansyon sa US, samutsaring ariarian sa Pilipinas at milyun-milyong piso rin ang produkto ng pangungulimbat ni Ligot. **AB**




# Arroyo-Cojuangco, patuloy ang sabwatan sa coco levy

Muli na namang nabunyag ang maanomalyang sabwatan nina Gloria Arroyo at Eduardo "Danding" Cojuangco upang kopohin ang pondo ng *coco levy* at ipagkait ito sa mga maralitang magniniyog. Ang pondong ito, na sapilitang kinulekta ng diktadurang Marcos mula sa mga magniniyog noong dekada 1970, at inilagag sa bangkong kontrolado ni Cojuangco ay iligal na ginamit para bilhin ang 47% ng sapi ng San Miguel Corp. (SMC). Nang mapatalsik ang diktadurang Marcos noong 1986, hinawakan ng gubyrerno ang mga sapi sa pamamagitan ng Presidential Commission on Good Government (PCGG). Mula noon, sarisari nang maniobra at sabwatan ang ginawa nina Cojuangco at mga naghaharing pangkatin para pag-agawan at kontrolin ang pondong dapat ay pagmamay-ari ng maliliit na magniniyog.

Nabunyag ang pakikipagsabwatan ni Arroyo kay Cojuangco nang ipahayag nitong Abril 29 ni Haydee Yorac, tagapangulo ng PCGG na magbibitiw na siya matapos ang mahabang pakikipagtunggali sa rehimeng Arroyo kaugnay ng mga ari-ariang binili sa pamamagitan ng pondong *coco levy*. Dalawang buwan nang pinagbibitiw ng rehimen si Yorac dahil sa kanyang pagtutol sa planong pagbebenta sa 27% sapi na hawak ng gubyrerno sa SMC. Gayundin, kabangga ng rehimen si Yorac sa mga plano nitong makipag-areglo kay Danding Cojuangco kaugnay ng kontrol sa mga saping ito. Malaon nang tinututu-

lan hindi lamang ni Yorac kundi ng mga magniniyog ang anumang pakikipag-areglo kay Cojuangco. Noong nakaraang taon, ibinunyag at tinawag ni Yorac na "iligal at imoral" ang kasunduan nina Arroyo at Cojuangco na inareglo ni Dante Ang na magbibigay ng mas masaklaw na kontrol kay Cojuangco kapalit ng malaking halaga.

Hayagang binabatikos ni Yorac ang papalaking kontrol ni Danding Cojuangco sa San Miguel sa nakaraang apat na taon at ang lan-



tarang pagsuporta rito ni Arroyo. Isa sa nilabanan ni Yorac ang pagbebenta ni Cojuangco ng mga sapi noong 2002 sa Kirin Brewery, isang kumpanyang Hapones. Nanghimasok si Arroyo kaya nakapasok ang Kirin. Nagresulta ito sa pagdami ng mga tauhan ni Cojuangco sa *board of directors* o lupong tagapangasiwa ng kumpanya dahil pumaloob ang mga tauhan ng Kirin sa dominanteng bloke ni Cojuangco. Kaya bukod sa 20% hawak ni Cojuangco, sa aktwal ay hawak din niya ang 20% sapi ng Kirin.

Nitong taon, muli pang lumiit ang bahagi ng SMC na kontrolado ng gubyrerno nang magbenta si Cojuangco ng karagdagang sapi ng

SMC sa publiko. Dahil dito, nakatakdang bumaba sa 23% mula sa 27% ang hawak na sapi ng gubyrerno. Maaari ring matanggal sa *board of directors* ng SMC ang isa sa limang kinatawan ng gubyrerno. Sa kabila nito, hindi lamang sinuportahan ni Arroyo ang pagbebenta, tahasan pa nitong inatasan ang mga kinatawan ng gubyrerno sa SMC na suportahan ang anumang pakana ni Cojuangco.

Bahagi ng sabwatan nina Arroyo at Cojuangco para kapwa sila makinabang ang malaon nang balak ni Arroyo na ibenta ang mga saping hawak ng gubyrerno sa SMC. Ayon kay Arroyo, habang nakatali ang pondo sa San Miguel, interes lamang nito ang napupunta sa kaban ng rehimen. Samantala, bilyun-bilyong piso ang kikitain ng gubyrerno kung ibebenta ang mga sapi. Minamadalit nitong ipagbili ang mga sapi habang hindi pinal ang desisyon ng Korte kung sino ang tunay na nagmamay-ari ng pondo para

kung pumabor man ang hatol kay Cojuangco ay napagkakitaan na ng rehimen ang mga sapi. Ang naturang mga sapi ay isa sa iilan na lamang na natitirang pag-aaring hawak ng estado na maaari pa ring pagkakitaan nang malaki-laki ng naghaharing pangkatin. Tinatayang aabot sa P47 bilyon ang halaga nito.

Ang totoo ay si Cojuangco rin lamang ang may kakayahang bumili sa mga pinagtatalunang sapi ng SMC. Sa gayon, kapag nabili ito ni Cojuangco, makakamit niya ang malaon na niyang inaasam na kontrol sa SMC, at tatabo ang pangkating Arroyo ng bilyun-bilyon mula sa transaksyon.



# Patuloy ang pagsulong ng rebolusyonaryong pakikibaka sa Nepal

**B**uong-husay na nasasamantala ng Communist Party of Nepal (Maoist) [CPN(M)] at ng pinamumunuan nitong People's Liberation Army (PLA) ang pampulitikang krisis sa Nepal para paigtingin ang armadong rebolusyon. Sunud-sunod na malalaki't maliliit na opensiba ang matagumpay na nailunsad ng PLA mula nang magpataw ng batas militar si Haring Gyanendra noong Pebrero bunsod ng paglakas ng armadong rebolusyon.

Siyam na taon nang naglulunsad ng digmang bayan ang CPN(M) sa Nepal, isang maliit at mabundok na bansa sa hilaga ng India na nakapailalim sa isang pyudal na monarkiya.

Sa serye ng mga opensiba ng PLA nitong huling mga buwan, malulubhang pinsala ang tinamo ng reaksyunaryong Royal Army sa iba't ibang panig ng bansa kabilang ang palibot ng kabiserang Kathmandu. Ilampung sundalo ng guberno ang napatay sa mga sagupaan at daan-daan naman ang nasugatan.

Upang ilingid sa mamamayan ang pagkayanig ng rehimen at iwasan ang pagbagsak ng moral ng mga pasistang tropa, binusalan ni Gyanendra ang masmidya.

Subalit bigo ang rehimen sa tangkang pahupain ang galit ng mamamayan. Ang 11 araw na pangkalahatang welga mula Abril

2 ay nagpakita ng napakalawak na suporta ng mamamayan sa panawagan ng mga rebolusyonaryong pwersa na wakasan ang pyudal na monarkiya. Ito na ang pinakamataagal na pangkalahatang welga sa kasaysayan ng Nepal. Naparalisa nito ang kalakhan ng transportasyon at naisara ang karamihan ng mga pabrika, pamilihan, upisina ng guberno, paaralan at mga negosyo.

**Desperado ang rehimen.** Habang sabay na naglalagablab sa buong bansa ang malawakang welga at ang mga armadong opensiba ng hukbong bayan, lalong naging desperado ang mga hakbang ng estado. Pinag-ibayo ng Royal Army ang pasistang pandarahas nito sa mamamayan laluna sa mga base ng mga pwersang Maoista. Sa distritong Kapi Bastu, halimbawa, may isandang bahay ang sinunog ng mga sundalo at 12 katao ang pinaslang kabilang ang ilang aktibistang Maoista. Libu-libong mamamayan ang napwersang lumikas patungong


India bunga ng pasistang kampanya.

Kasabay ng pasistang pandarahas, desperado ring nagpapalagana ang rehimen ng malisyosong mga kasinungalingan laban sa rebolusyonaryong kilusan. Nagpaparada ito ng mga ordinaryong mamamayan sa telebisyon at pinalalabas na sila ay mga sumukong Maoista. Ipinagkakalat din ng Royal Army na may nagaganap umangong bangayan sa hanay ng liderato ng CPN(M).

Ngunit hindi mapigil ng mga hakbangin ng rehimen ang pagkahiwalay nito hindi lamang sa Nepal kundi sa internasyunal na komunidad.

Sa kabilang panig, tuluy-tuloy naman ang pag-unlad ng rebolusyonaryong guberno sa malawak na kanayunan ng bansa. Habang sumasahol ang pampulitikang krisis sa Nepal, bumibilis ang pagsulong ng matagalang digmang bayan.

AB





## Makasaysayang kumperensya sa Bandung, ginunita



**P**inangunahan ng International League of People's Struggle (ILPS) ang paggunita sa ika-50 anibersaryo ng pagdaraos ng Bandung Asia-Africa Conference (BAAC) nitong Abril 13-14 sa Bandung, Indonesia. Ang paggunita, na dinaluhan ng mga kinatawan mula sa 14 na bansa at 40 organisasyong masa ay nagbigay-pugay sa 10 prinsipyo ng mapayapang ugnayan sa pagitan ng mga bansang naggiit ng kalayaan laban sa kolonyalismo. Ilan sa mga prinsipyong ito ang pagrespeto sa teritoryo ng bawat bansa, di pagsasalakayan, di panghihimasok ng mga bansa sa mga internal na usapin, pagkakapantay-pantay at kagalingan.


Dahil ang sitwasyon sa ekonomya, pulitika at militar ng mga atrasadong bansa ay mas masahol ngayon kaysa noong 1955, ang mga mamamayan ng mga atrasadong bansa ay lalong naghuhumiyaw para sa kalayaan sa pagsasamantala at pandarambong ng imperyalismo at globalisasyon. Bilang pagtaguyod sa pamana ng BAAC, pinagtibay ng mga nagsipagdalang ang pagpapatuloy ng pakikibaka para sa kasarinlan, pagpapasya-sa-sarili at kapayapaan laban sa imperyalistang gera at globalisasyon.

Ang BAC ay inilunsad noong Abril 1955 sa pangunguna nina Presidente Sukarno ng Indonesia at Premier Zhou Enlai ng China at dinaluhan ng 29 na bansa. Pinirmahan dito ang isang deklarasyon ng pagtutulungan ng mga bansang bagong laya sa kolonyalismo at lokal na naghaharing uri. Ito ay isang makasaysayang pagtitipon ng mga atrasadong bansa para labanan ang kolonyalismo, itaguyod ang pagkakaisa at pagtutulungan tungo sa pag-unlad batay sa mutwal na interes. Ang kumperensyang ito ang nagluwal sa Non-Aligned Movement noong 1961 na kinapalooban ng 77 atrasadong bansa. Kinatawan nila ang hinaing para sa kalayaan ng mga mamamayan sa buong mundo laban sa imperyalismo at digmaang nukle-  
**AB**

## Mga atake sa mga mamamahayag, nagpapatuloy

DALAWANG mamamahayag ang pinagbabaril dahil sa kanilang paninindigan laban sa korapsyon at mga anomalya. Namatay si Klein Cantoneros, komentarista ng DXAA-FM noong Mayo 4 sa Dipolog City. Noong Abril 29, binaril at lubhang nasugatan si Nestor Seguis-mundo, komentarisista ng DZXE ng Vigan, Ilocos Sur.

Halos magkasunod na naganap ang mga pag-atake sa panahong ipinagdiriwang ng mga mamamahayag ang World Press Freedom Day (Pandaigdigang Araw para sa Malayang Pamamahayag) nitong Mayo 3. Kasabay nito, tinukoy ng komite ng US para sa proteksyon ng mga mamamahayag na isa ang Pilipinas sa pinakamapanganib na lugar sa mundo para sa mga mamamahayag, kahanay ng Iraq, Colombia, Bangladesh at Russia.



## Military logistics director ng US, nanghimasok sa Pilipinas

PUMUNTA sa Pilipinas nitong Abril 25 ang pinuno ng *logistics* ng US Pacific Command para makipag-usap sa matataas na upisyal ng militar at depensa sa bansa hinggil sa "kontra-terorismo."

Layunin ng pagpunta ni Brig. Gen. James Lewis Kennon ng US Army na repasuhin ang mga aktibidad ng AFP at militar ng US hinggil sa seguridad, kabilang ang programa ng AFP hinggil sa pagbili ng mga suplay at kagamitang-militar. Ilan sa mga kinausap ni Brigadier General Kennon sina Sec. Avelino Cruz Jr. ng depensa at Gen. Efren Abu, hepe ng AFP.

Ayon sa embahada ng US sa Pilipinas, ang pulong na ito ay bahagi ng serye ng mga pag-uusap sa pagitan ng dalawang bansa hinggil umano sa mga programa para sa sustenidong kakayahang "kontra-terorismo."

## Operasyong saywar ng US sa Sulu, pinaghahandaan

PINAGHAHANDAAN na ng mga tropang Amerikano ang paglulunsad ng mga operasyong saywar sa Jolo, Sulu. Nitong Mayo 1, dalawampu't limang ekspertong tropang Amerikano ang dumating sa Jolo upang magsagawa ng dalawang linggong "pagtatasa" sa lugar.

Ayon sa pinuno ng grupo na si Lt. Col. Greg Wilson, ang misyon nila ay alamin kung anu-ano raw ang kinakailangang mga serbisyo ng mamamayan sa lugar bilang paghahanda sa ilulunsad na *civil-military operations* ng mga tropang Amerikano sa Jolo. Bahagi raw ito ng Visiting Forces Agreement.

Ang totoo, operasyong paniktik ang pakay ng 25 tropang Amerikanong nagsidatingan bilang paghahanda sa papataas na antas ng interbensiyong militar, partikular sa mga erya ng mga Moro.

## Pwersang militar ng US, inaming banat na

BANAT na banat na ang pwersang militar ng US at limitado na ang kakayahan nitong sumabak sa isa pang malaking gera. Inamin ito ni Gen. Richard Myers sa kanyang pahayag sa harap ng kongreso ng US nitong Mayo 3. Si Myers ang tagapangulo ng Joint Chiefs of Staff ng US.

Kung sasabak ang US sa isa pang digma, magiging mas matagal ito at malalagay sa mas malaking kapahamakan ang mga tropang militar nito. Sa ngayon pa lamang sa Iraq at Afghanistan, hindi na nasusunod ng mga tropang militar ng US ang disenyo ng mabilis at presiyong pakikipaglaban. Ni hindi nila mapagpasyang nagagapi ang kanilang mga kaaway.

Nagbabala si Myers na mas malalaking kaswalti pa ang tatamasain ng US sakaling salakayin ni Pres. George W. Bush ang alinman sa Cuba, Iran at North Korea—mga bansang kabilang sa binansagan nitong "outposts of tyranny" o mga balwarte ng kalupitan.

Sa ngayon, hindi na makaahon-ahon ang 138,000 tropang Amerikano sa kumunoy ng Iraq habang natatali naman ang 18,000 sundalo sa Afghanistan. Sa nakaraang dalawang taon, lampas sa 1,500 sundalong Amerikano na ang namamatay sa Iraq, mahigit 11,000 na ang nasugatan at mahigit 14,000 na ang inilikas dulot ng sarisaring kapananan sa pag-iisip na iniresulta ng gera.

## \$100 milyon para sa rekonstruksyon ng Iraq, nawawala

AABOT sa \$100 milyon na nakatakda para sa rekonstruksyon ng Iraq ang pinangangambahang kinurakot, inabuso o winaldas ng mga upisyal ng Coalition Provisional Authority (CPA), ang komiteng itinayo at tinauhan ng US upang mangasiwa sa okupasyon nito sa bansa. Bahagi ng pondong ito ang kita mula sa pagbebenta ng langis ng Iraq at mga ari-arian ng gubyrerno ni Saddam Hussein.

Ayon sa upisyal na nagsagawa ng awdit, sa isang bahagi ng Iraq pa lamang, \$7 milyon ang nawawala at \$89 milyon naman ang walang karampatang pagtutuos (*accounting*).

Sa di kumpletong tala ng nagsagawa ng awdit, natuklasan nito ang samutsaring anomalya sa pangangasiwa ng pondong pangrekonstruksyon. Mayroong kaso ng pagbabayad sa isang kontraktor ng dalawang beses para sa parehong serbisyo, pagbabayad ng \$300,000 para sa mga kinanselang kontrata at pagkawala ng \$700,000 matapos umalis ang mga upisyal na nangangasiwa rito.

## Fidel Castro, nanawagan para sa pagkakaisa ng mamamayang Amerikano at Latino

IPINANAWAGAN ni Presidente Fidel Castro ng Cuba ang pakikipagkaisa ng mamamayan ng US sa kanilang mga kapatid na Latino Amerikano sa pakikibaka para sa katarungan, katotohan at kaligtasan ng kanilang mga lahi. Ipinahayag niya ito sa harap ng isang milyong Cubano na nagrali sa Plaza de la Revolucion sa Havana, kabisera ng Cuba, noong Mayo 1.

Kasabay nito, mariing binatikos at kinutya ni Castro ang rehimeng Bush na aniya'y sinungaling at sangkot mismo sa mga teroristang gawain at pananalakay. Ayon kay Castro, pinakahuling halimbawa nito ang kaso ni Luis Posada Carilles, isang internasyunal na terorista na nahuli sa Venezuela at tumakas noong Marso patungong US. Sangkot si Posada Carilles sa mga pakanang destabilisasyon laban kay Pres. Hugo Chavez ng Venezuela, na kilala sa kanyang paggigiit ng pambansang interes ng kanyang bansa laban sa imperyalismong US.

Hindi inaresto ng mga ahente ng US Department of Homeland Security si Posada Carilles, at sa halip ay hinahayaan siyang humingi ng political asylum o magpakanlong sa gubyrerno ng US. Iginiit ni Castro na dapat arestuhin ng US si Posada Carilles, ideport siya sa Venezuela at ipaubaya sa mga korte roon ang paglilitis sa kanya.

**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Taon XXXV Blg. 9  
Mayo 7, 2005  
[www.philippinerevolution.org](http://www.philippinerevolution.org)

*Editorial*

## Palawakin ang antipasistang pagkakaisa


**K**agyat ang pangangailangan para ibayong bigkisin ang hanay ng mamamayang Pilipino laban sa lumalalang pagyurak sa mga karapatang sibil at nagbabadyang lantarang pasistang paghahari.

Mula 2001, aabot na sa 51 lider at kasapi ng progresibong partidong Bayan Muna ang pinatay at 14 ang dinukot at hindi pa natatagpuan. Labingwalong pinuno at myembro ng Anakpawis na ang pinaslang. Kinitil ang buhay ng dalawang kasapi ng Gabriela Women's Party. Walang humpay ang pagpaslang sa mga sibilyan, laluna sa mga magsasakang nagsusulong ng tunay na reporma sa lupa subalit pinaratangang may kaugnayan sa rebolusyonaryong armadong kilusan. Lalong lumalawak ang saklaw ng pasistang panunupil kung ibibilang din ang napakarami nang kaso ng mga bigong pagpatay, pagdukot, iligal na pang-aaresto at pagkulong at iba't ibang anyo ng pananakot.

Kaakibat ng serye ng pamamaslang sa mga demokratikong pwersa ang puspusang pagtutulak ng rehimeng US-Arroyo sa mga pasistang panukala tulad ng Anti-Terrorism Bill at ng National ID System. Ang lahat ng ito'y naghahawan ng daan para sa pagpapatay ng paghaharing militar sa buong bansa.

Ngayon pa lamang ay halos batas militar na ang umiiral sa maraming bahagi ng bansa. Sa Catbalogan, Samar, mula nang itilagang he-

pe ng 8th ID ang berdugong si Maj. Gen. Jovito Palparan, Jr. ay nagtayo na ng detatsment ang militar sa bawat barangay at tuwi-tuwina'y sinosona ang mga komunidad ng maralita. Apat na myembro ng Bayan Muna mula sa bayang ito ang dinukot nitong Abril. Isa sa kanila ay patay na samantalang ang tatlo ay hindi pa natatagpuan. Sa kanayunan ng Eastern Visayas, libu-libong mamamayan na ang namakwit sa kanilang mga baryo dahil sa mababangis na operasyong militar at walang awang pagpatay ng AFP sa



***Mga tampok sa isyung ito...***

**Ang brutal na gera ng rehimeng US-Arroyo**  
PAHINA 3

**Araw ng Paggawa**  
PAHINA 6

**Mga detalye ng korapsyon ng rehimen**  
PAHINA 8

## Mga instruksyon sa paglilimbag

**1.** Ang sinundang pahina, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

**2.** Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

**3.** Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa *angbayan@yahoo.com*